



REPUBLIKA E SHQIPËRISË  
INSTITUCIONI I PRESIDENTIT TË REPUBLIKËS  
SEKRETARI I PËRGJITHSHËM

Nr. 4468/11 Prot.

Tiranë, më 2.12.2019

**Lënda:** Kërkohet informacion shtesë mbi azhornimin e të dhënave për listat e kandidatëve prokurorë që plotësojnë kushtet për hedhjen e shortit për zgjedhjen e Këshillit të Emërimeve në Drejtësi, përcjellë nga KLP shkresë nr.901 prot, datë 15.11.2019.

**Drejtuar:** Zotit Gent IBRAHIMI  
KRYETAR I KËSHILLIT TË LARTË TË PROKURORISË

**Për dijëni:** Zonjës Erinda BALLANCA  
AVOKATI I POPULLIT

TIRANË

*I nderuar zoti Ibrahim,*

Në vijim të shkresës sonë nr. 4329/1 Prot, datë 22.11.2019 për të cilën ende nuk kemi një përgjigje nga institucioni juaj, ju bëjmë me dije se:

Në nenin 221 të ligjit nr. 115/2016 “Për organet e qeverisjes së sistemit të drejtësisë”, të ndryshuar, konkretisht përcaktohet se:

*Neni 221*

***Kushtet dhe kriteret për t’u përfshirë në shortin për zgjedhjen e anëtarëve të Këshillit dhe procedurat e përzgjedhjes***

***1. Mund të përfshihen në shortin për zgjedhjen e anëtarëve të Këshillit të Emërimeve në Drejtësi vetëm ata magistratë dhe gjyqtarë të Gjykatës Kushtetuese, të cilët, në momentin e organizimit të shortit, plotësojnë kushtet e mëposhtme:***

- a) në kohën e hedhjes së shortit magistrati që ushtron detyrën pranë gjykatave administrative, gjykatave të apelit, prokurorive pranë gjykatave të apelit dhe Prokurorisë së Përgjithshme ka ushtruar funksionin e magistratit për të paktën 10 vjet;***
- b) nuk ka një masë disiplinore në fuqi;***
- c) nuk ka filluar një procedim disiplinor para kandidimit;***
- ç) shfuqizuar***
- d) shfuqizuar.***

dh) magistrati është vlerësuar të paktën “shumë mirë” në 2 vlerësimet e fundit etike dhe profesionale, **nëse janë të disponueshme;**

e) magistrati ose gjyqtari i Gjykatës Kushtetuese **nuk është nën hetim** ose nuk është dënuar më parë me vendim gjyqësor të formës së prerë për kryerjen e një vepre penale;

ë) magistrati ose gjyqtari i Gjykatës Kushtetuese nuk është dënuar më parë me sanksion administrativ për shkelje të rregullave ligjore në lidhje me deklarin e pasurisë dhe konfliktin e interesave.

## **2. Kandidatët që nuk plotësojnë një nga këto kushte përjashtohen nga shorti.**

3. Jo më vonë se data 15 nëntor e çdo viti kalendarik, Gjykata Kushtetuese, Këshilli i Lartë Gjyqësor dhe Këshilli i Lartë i Prokurorisë verifikojnë nëse kandidatët për anëtarë të Këshillit të Emërimeve në Drejtësi plotësojnë kushtet e parashikuara në pikën 1, të këtij neni, dhe i paraqesin Presidentit të Republikës dhe Kuvendit listën e kandidatëve që plotësojnë kushtet.

4. Lista me kandidatët që i plotësojnë kushtet dhe lista me kandidatët që nuk plotësojnë kushtet bëhen publike në faqet zyrtare të institucioneve përkatëse.

5. Kandidatët e përjashtuar njoftohen me shkrim, individualisht dhe në mënyrë të arsyetuar për shkaqet e përjashtimit. Ata mund të ankohen brenda 5 ditëve nga data e njoftimit në Gjykatën Administrative të Apelit.

6. Gjykata Administrative e Apelit vendos brenda 7 ditëve nga data e depozitimit të ankimit. Vendimi i saj është përfundimtar dhe i formës së prerë.

7. Presidenti i Republikës, në prani të Avokatit të Popullit, përzgjedh anëtarët e Këshillit me short midis datës 1 dhe 5 dhjetor të çdo viti kalendarik. Përveç anëtarëve të parashikuar në pikën 1, të nenit 220, të këtij ligji, Presidenti i Republikës zgjedh edhe një anëtar zëvendësues nga secili institucion në të njëjtin short.

8. Nëse Presidenti i Republikës nuk arrin të përzgjedhë anëtarët e Këshillit deri në datën 5 dhjetor, Kryetari i Kuvendit, në prani të Avokatit të Popullit, i përzgjedh ata brenda datës 10 dhjetor të atij viti kalendarik.

9. Presidenti i Republikës, miraton rregulla të mëtejshme për zhvillimin e procedurës së shortit, të cilat, në çdo rast, duhet t’u përmbahen parimeve të transparencës, gjurmueshmërisë dhe monitorimit të procesit.

10. Rezultatet e shortit dhe përmbledhja e procesverbalit të procesit të shortit bëhen menjëherë publike në faqen zyrtare të internetit të Presidentit të Republikës.

11. Avokati i Popullit bën menjëherë publik në faqen zyrtare të institucionit raportin e monitorimit të procesit të shortit”.

Referuar dispozitave të pikës 1 dhe 2 të nenit 221 të sipërcituar rezulton se, mund të përfshihen në short vetëm ata kandidatë të cilët deri në **momentin e organizimit të shortit, plotësojnë kushtet dhe kriteret e këtij neni.**

**Në këtë mënyrë është e nevojshme shkëmbimi i informacionit midis institucioneve tona deri në momentin e hedhjes së shortit, të përcaktuar nga Presidenti i Republikës për tu zhvilluar në datë 5 dhjetor 2019.**

Duke qenë se plotësimi i kushteve dhe kriterëve të ligjit për kandidatët e përfshirë në listë për hedhjen e shortit për anëtarët e KED-së është një detyrim që duhet të përmbushet deri në momentin e organizimit të shortit (datë 5 dhjetor 2019), Presidenti i Republikës në mbështetje të nenit 92 germa h të Kushtetutës dhe pikës 1 dhe 2 të nenit 221, të ligjit nr. 115/2016, i ndryshuar, kërkon nga ana



Këshilli i Lartë i Prokurorisë verifikimin në vijimësi të plotësimit të kushteve dhe kriterëve nga prokurorët e përfshirë në listën e dërguar nga ana juaj me shkresë nr. 901 prot, datë 15.11.2019, deri në momentin e organizimit të shortit dhe dërgimin menjëherë të çdo të dhëne apo informacioni zyrtar në mënyrë që në momentin e organizimit të shortit në datë 5 dhjetor 2019 të përfshihen në short ata kandidatë prokurorë që plotësojnë ende kushtet dhe kriteret ligjore.

Me qëllim për zgjedhjen e rregullt dhe sipas parashikimeve Kushtetuese dhe ligjore të përbërjes të Këshillit të Emërimeve në Drejtësisë, informacioni apo çdo e dhënë shtesë e krijuar apo që KLP është vënë në dijeni pas datës 15.11.2019 që shërben për azhornimin e përbërjes së listës dhe kandidatëve që kualifikohen sipas ligjit, të dërgohet në çdo kohë përpara momentit të hedhjes së shortit, datë 5 dhjetor 2019.

Ndërkohë ju kujtojmë që jemi ende në pritje edhe të informacionit të kërkuar me shkresën tonë nr. 4329/1 Prot, datë 22.11.2019.

*Duke ju falënderuar për bashkëpunimin,*

**SEKRETARI I PËRGJITHSHËM**

**ORNELA ZONJA**

